



ル 5
3252
8



門 九 5
號 3252
卷 8

昭和十七年
五月二十一日
購求

廣東考古輯要卷三十八

謫宦

漢

張由中郎謁者哀帝即位遣由將醫治中山小王孝王子時未滿歲有管病

由素有狂易病病發怒去西歸長安尚書簿責擅去狀由恐

因誣言中山太后孝王太后馮昭儀也祝詛上及太后中山太后遂飲

藥張由因賜爵關內侯哀帝崩孔光奏由前誣告骨肉以取

爵秩結怨天下請免為庶人徙合浦

毋將隆哀帝即位以高第入為京兆尹遷執金吾王莽少時慕

與隆交隆不甚附哀帝崩莽秉政使大司徒孔光奏隆前為

冀州牧治中山馮太后獄冤陷無辜免官徙合浦

董恭董賢父也賢寵愛日甚父亦遷為少府賜爵關內侯弟寬

信爲駙馬都尉哀帝崩賢自殺恭及寬信與家屬徙合浦
傅晏以皇后父封孔鄉侯傅氏旣盛晏最尊重元壽中爲大司
馬衛將軍王莽用事免傅氏官爵歸故郡晏將妻子徙合浦
王章泰山鉅平人爲京兆尹時帝舅大將軍王鳳輔政章奏封
事召見言鳳不可任用遂爲鳳所陷下廷尉妻子皆收繫章
死妻子徙合浦鳳薨後弟成都侯商白上還章妻子故郡其
家屬皆完具采珠致產數百萬時蕭育爲泰山太守令贖還
田宅

後漢

陰軼弟政據後漢書當作敞和帝永元八年立皇陰氏父綱封防侯子軼
政等皆黃門郎後陰后與外祖母鄧祀祝詛遂廢軼等徙合
浦

一三國

虞翻字仲翔會稽餘姚人孫權以爲騎都尉翻數犯顏爭諫權
不悅又性不諧俗多見毀謗坐徙丹陽呂蒙還建業請以自
隨權旣爲吳王歡宴之末自起行酒翻伏地陽辟不持權去
翻起坐權於是大怒手劔欲擊之大司農劉基諫免又數有
酒失權與張昭論及神仙翻指昭曰彼皆死人而語神仙世
豈有神仙也權積怒非一遂徙翻交州雖處罪放而講學不
倦門徒常數百人在南十餘年年七十卒歸葬舊墓妻子得
還有子十一記最知名

顧譚字子默赤烏中代諸葛恪爲左節度加奉車都尉時譚弟
承與張休俱北征壽春全琮時爲大都督與魏將王凌戰於
芍陂不利休承奮擊之遂駐魏師琮羣子緒端亦并爲將因

敵旣駐乃進擊之凌軍退論功行賞譚以爲駐敵功大退敵
功小休承並爲雜號將軍緒端偏裨而已琮子寄素恨譚因
與其父構之譚坐徙交州幽而發憤著新言二十篇其知難
篇蓋以自悼傷也

顧承爲侍中芍陂之役拜奮威將軍數年與兄譚張休等俱徙

交州

張休字叔嗣彭城人弱冠爲太子登僚友權嘗夜獵休上疏諫

權善之後爲楊武將軍以芍陂論功事徙交州

樓元字承先孫皓卽位勅有司求忠清之士遂用元主殿中事
以直切忤皓意責付廣州東觀令華覈上疏畧曰諸吏之中
任幹之事足委杖者無勝樓元元清忠奉公端寃當世乞赦
前愆責其後效皓疾元聲名復徙元及子據付交阯

薛瑩字道言綜子孫皓初爲左執法遷選曹尙書建衡三年何

定建議鑿聖谿以通江淮皓令瑩督萬人往以多磐石難施
功罷還後定被誅皓追聖谿事下瑩獄徙廣州尋以華覈言
召還爲國左史

王著王蕃弟也孫皓初蕃以逆意及失酒見殺家屬徙廣州二
弟著延皆作佳器郭馬起事不爲馬用遇害

張尚絃之孫也有俊才孫皓時以言語辯捷見知擢中書令吳
主忌勝己者尚談論每出其表恨之後問孤飲酒可以方誰
尚曰陛下有百觚之量吳主曰尚知孔邱不王而以孤方之
怒收尙岑昏請代尙死徙廣州

晉

孫泰孫恩叔父師事錢塘杜子恭子恭死泰傳其術浮狡有小

才誑誘百姓愚者敬之如神慶王珣言於會稽王道子流之
廣東太子少傅王雅先與秦善言於孝武帝以秦知養性之
學召還

王誕字茂世爲琅邪內史以結事元顥廢人張法順故爲所寵
元顥討桓元欲悉誅桓氏誕因陳修等與元志趣不同得免
及元得志將誅修爲之陳請乃徙廣州盧循據廣州以誕爲
平南府長史甚賓禮之誕久客思歸因說循循然之時廣州
刺史吳隱之亦爲循所拘誕又曰將軍今留吳公公私非計
孫伯符豈不欲華子魚但以一境不容二君於是誕及隱之
並還

宋

何長瑜自國侍郎至平西記室參軍臨川王慶義招集文士長

瑜嘗於江陵寄書與宗人何勗以韻語序義慶州府僚佐云
陸展染白髮欲以媚側室青青不解久星星行復出輕薄少
年遂演之其文流行慶義大怒白文帝除廣州所統增城令
謝靈運陳郡陽夏人文章之美江左無二性豪奢肆意遊遨嘗
自始寧南山伐木開徑直至臨海太守孟顥因其橫恣百姓
驚擾乃表其異志言於太祖太祖知其誣不罪也不欲使東
歸以爲臨川內史在郡游放不異永嘉爲有司所糾遣鄭望
生收之靈運與兵叛追討禽之論斬上愛其才徙付廣州旋
以趙欽事棄市臨死作詩曰龔勝無餘生李業有終盡稽公
理既迫霍生命亦隕悽悽凌霜葉網網衝風菌邂逅竟幾何
修短非所愍送心正覺前斯痛久已忍恨我君子志不獲巖
上泯子鳳早卒

顧邁輕薄而有才能始興王濬待之甚厚深言密事皆與參之邁悉以語劉瑀瑀曰之儻大怒啟文帝徙邁廣州

沈懷遠吳興武康人爲始興王濬征北長流參軍深見親待坐

納王鸚鵡爲妾世祖徙之廣州

垣襲祖垣護之子爲淮陽太守孝武以事徙之嶺南後殺之臨死與榮祖書曰弟常勸我危行言孫今果敗矣

徐爰字長玉孝建初爲左丞巧於將迎太宗在藩素所不說及卽位詔徙付交州交州土人孝長仁爲亂悉誅北來流寓無或免者長仁素聞爰名以智計誑誘故得無患久之聽還

齊

劉祥字顯徵建元中爲正員卽撰宋書譏斥禪代尙書令王儉密以啟聞上銜而不問祥忽著連珠十五首以寄其懷人有

以祥連珠啟上者上令御史中丞任遐奏其過惡付廷尉上別遣勅祥曰我當原卿性命令卿萬里思愆乃徙廣州不得意終日縱酒卒

梁

范縝字子真舞陰人范雲從兄爲宜都太守以母憂去職居南州梁武至縝墨纓來迎武帝與縝有西邸之舊見之悅甚及建康城平選縝尙書左丞縝在齊時與尙書令王亮同臺爲郎舊相友愛至是亮擯棄在家縝以首迎武帝志在權軸而所懷未滿亦怏怏故私相親結以矯於時竟坐亮徙廣州

隋

薛道衡字元卿除吏部侍郎坐抽擢人物有言其黨蘇威任人有意故者除名配嶺表尋詔還

王頰字景文年二十尚不知書爲其兄所責怒於是感激勤學累載遂徧通五經又曉兵法常以將相自許每歎不逢時開皇五年授著作佐郎後坐事配放嶺南

柳謩之字公正爲周宣納上士高祖作相引爲田曹參軍侍送光化公主於西域復送義成公主於突厥前後奉使得二國所贈皆散之宗族家無餘財大業初拜黃門侍郎時方重王府之選拜爲齊王長史及王得罪坐除名帝幸遼東召謩之檢校燕郡事及帝至燕郡坐供頓不給配戍嶺南卒於淮口

唐

王義方泗州漣水人爲太子校書坐與刑部尚書張亮交通貶儋州吉安丞行至海南酌水爲文而祭時當盛夏風濤蒸毒旣而開霽南渡吉安蠻俗荒梗義方召諸酋領集生徒親爲

講經蠻酋大喜

桓彥範字士則潤州曲阿人爲司刑少卿時則天不豫張易之與弟昌宗潛圖逆亂彥範及中臺右丞敬暉等建策誅之後爲武三思所構貶瀧州司馬又長流懷州令周利貞矯制害之

敬暉字仲煜絳州太平人以誅張易之昌宗功封齊國公後爲武三思所誣貶崖州司馬遣周利貞害之

張柬之字孟將襄陽人誅張易之兄弟柬之首謀中宗卽位封漢陽郡王爲武三思所構貶新州司馬

袁恕已滄州東光人敬暉等將誅易之兄弟恕已預其謀又統率南衙兵仗以備非常及事定封南陽郡王則天崩中宗詔貶賓州司馬又流環州爲周利貞所逼飲野葛數升不死乃

擊殺之

李邕字泰和廣陵江都人元宗清內難拜殿中侍御史尋貶崖州復為陳州刺史元宗車駕東封迴邕謁見累獻詞賦稱旨由是頗自矜謂當居相位為張說所嫉俄而陳州賊事發下獄貶欽州遵化縣尉

裴朏為考官禮部郎中與起居舍張烜監察御史宋昱右判拾遺孟正朝天寶二年皆貶官嶺外時御史中丞張倚男奭考選列首眾知奭不讀書議論紛然元宗大集登科人御花萼樓親試升第者十無一二焉奭手執試紙竟日不下一字謂之曳白

劉長卿字文房知淮南鄂岳轉運留後鄂岳觀察使吳仲孺誣奏貶播州南邑尉會有為之辨者除睦州司馬終隨州刺史

以詩馳聲上元寶應間

韓會嘗為起居舍人與元載善元載敗坐貶韶州司馬時韓愈生三歲而孤隨會貶官嶺表會死退之後至曲江云憶昨兒童隨伯氏南來今只一身存目前百口還相逐舊事無人可共論

盧杞字子良故相懷慎之孫居相位忌能妬賢天下無賢不肖皆視之如讐德宗在奉天為朱泚攻圍李懷光自魏縣赴難或謂王翊趙贊曰懷光累歎憤以為宰相謀議乖方使其言入豈不殆哉翊贊白於杞杞大駭奏使懷光乘勝進收京城帝然之詔懷光克期齊進懷光大怒遂謀異志德宗方悟為杞所構貶新州司馬

韋觀謫潘州李明遠以詩送之

周東坡古軒輅卷三十一
韓愈字退之昌黎人登進士第累官至刑部侍郎憲宗使杜英
奇迎佛骨入大內愈上疏諫貶潮州刺史愈至潮陽上表略
曰臣所領州在廣府極東毒霧瘴氣日夕發作臣少多病年
纔五十髮白齒落理不長久加以罪犯至重所處又極遠惡
瞻望宸極魂神飛去伏惟陛下天地父母哀而憐之憲宗得
表因思其所諫佛骨事大是愛君欲復用之為皇甫鎛所惡
乃授袁州刺史初愈至潮陽郡西湫水有鱷魚食民畜產乃
令判官炮一豚一羊投湫水咒之夕有暴風雷起湫中數日
湫水盡涸徙於舊湫西六十里自是潮無鱷患

劉禹錫字夢得彭城人貞元九年擢進士第為監察御史與吏
部郎中韋執誼善貞元末王叔文用事後輩務進多附麗之
禹錫尤為叔文所知目為宰相器順宗即位文誥皆出於叔

文引禹錫及柳宗元入禁中與之圖議言無不從禹錫任喜
怒陵人京師人士不敢指名道路以目號二王劉柳叔文敗
坐貶連州刺史在道貶朗州司馬元和中召還復出為連州
刺史

皇甫鎛涇州臨涇人貞元初第進士累遷司農卿判度支以聚
斂進至宰相雖市道皆嗤之裴度極論其姦邪帝不聽穆宗
在東宮知其為人始聽政集羣臣於月華門貶鎛崖州司戶
參軍死其所

杜元穎鎮蜀州箕斂刻削軍民嗟怨太和中南韶蠻攻陷戎嵩
等州徑犯成都蠻首領箠顛遣人上表略曰蠻軍比修職貢
遽敢侵邊但杜元穎不恤三軍願陛下誅之坐貶循州司馬
李甘字和鼎長慶末進士擢第累官至侍御史鄭注求入中書

甘唱於朝曰宰相者代天理物先德望而後文藝注乃何人敢茲叨竊白麻若出吾必懷之相注之事竟寢李訓不獲已貶甘封州司馬

李德裕字文饒趙郡人吉甫之子穆宗即位召入翰林充學士李逢吉之黨惡之武宗朝累官至門下侍郎同平章事宣宗雖罷德裕承武宗恩顧委以樞衡決策論兵功流社稷及昭肅棄天下不逞之伍咸害其功白敏中令狐絢在會昌中德裕不以朋黨疑之置之臺閣顧待甚優及德裕失勢同謀斥逐而崔鉉亦以會昌末罷相怨德裕大中初敏中復薦鉉在中書乃相與搆摭構致貶德裕潮州司馬又貶崖州司戶卒年六十三三子煜為汴宋毫觀察判官坐父貶象州立山尉二子幼從歿崖州德裕素以器業自負而好著書為文初貶

潮州雜序數十篇號窮愁志又喜為寒俊開路元和丙申李逢吉下三十三人皆取寒素時有語曰元和天子丙申年三十三人同得仙袍似爛銀文似錦相將白日上青天及謫官南去或有詩曰八百孤寒齊下淚一時回首望崖州

崖嘏字乾錫為中書舍人誼士也李德裕之斥坐書制不深切貶端州刺史

薛元龜會昌中李德裕用為京兆少尹宣宗立罷德裕而元龜坐貶崖州司戶參軍

鄭亞字子佐元和中擢進士第文章秀發聰悟絕倫李德裕在翰林亞以文干謁深知之累官至刑部郎中及德裕貶潮州亞亦貶循州刺史卒

柳仲郢字諭蒙京兆華元人大中中為山南西道節度使南鄭

令權奕有罪郢杖之六日死貶雷州刺史

鄭仁表滎陽人鄭洎子有俊才擢第後爲起居郎恃才傲物人
士薄之嘗曰天瑞有五色雲人瑞有鄭仁表劉鄴少時投文
於洎仁表兄弟嗤鄙之咸通末鄴爲宰相仁表竟貶死南荒
李嗣真滑州匡城人博學兼善陰陽推算之術拜右御史中丞
時來俊臣等構陷無罪嗣真上書切諫不納尋被俊臣所陷
配流嶺南

韋方質雍州萬年人則天初司鳳閣鸞章平章事武承嗣用事
諸宰相咸傾附之方質疾假承嗣等詣宅問疾方質據牀不
爲之禮左右云踞見權貴恐招危禍方質曰吉凶命也大丈
夫豈能折節曲事近戚以求苟免也尋爲酷吏周興來子珣
所構配流儋州

俞文俊荊州江陵人則天時新豐因風雷山移乃改縣名爲慶
山四方畢賀文俊上書曰臣聞天氣不和而寒暑併人氣不
和而疣贅生地氣不和而埤阜出今陛下以女主處陽位反
易剛柔故地氣隔塞而山變爲災陛下謂之慶山臣以爲非
慶也則天大怒流於嶺外

張說字道濟其先范陽人代居河東又徙家河南之洛陽則天
朝拜鳳閣舍人時張易之與其弟昌宗構陷御史大夫魏元
忠引說合證其事說至御前揚言忠實不反此易之誣構耳
元忠由是免誅說坐忤旨配流欽州中宗卽位召還

張錫則天時坐贓論斬時蘇味道亦坐事同被訊繫司刑三品
院錫按轡專道神氣不懾日膳豐鮮無損貶味道徒步赴逮
席地菜食武后聞之釋味道旣而流錫循州

沈佺期相州內黃人進士善屬文尤長七言之作與宋之間齊名時稱沈宋爲員外郎坐贓配流嶺表

房融河南人武后時以正諫大夫同平章事因親附張易之兄弟配流欽州在廣州時天竺僧持楞嚴經梵本浮南海而至融就光孝寺譯出而筆授之今寺中有筆授軒

宋之間字延清一名少連號州宏農人弱冠知名尤善五言詩累轉尚方監丞左奉宸內供奉易之兄弟雅愛其才之間亦傾附焉睿宗卽位以之間嘗附張易之武三思配徙欽州賜死所有篇詠傳播遠近友人武平一爲之纂集成十卷行世賈直言河朔舊族也父道以藝待詔代宗時坐事賜鴆將死直言給其父曰當謝四方神祇使者少怠輒取鴆代飲迷而踣明日毒潰足而出夕乃蘇帝憐之減其父死俱流嶺南直言

以妻董少乃訣曰生死不可期吾去可亟嫁無須也董不答引繩束髮封以帛使直言署曰非君手不解直言二十年乃還署帛宛然及湯沐髮盡脫

竇申參族子累遷至京兆少尹轉給事中參特愛之每議除授多訪於申申或泄之以招權受賂所至人目爲喜鵲德宗數誠參參亦不悛後參以事貶郴州申亦流嶺南

李可及優人能新聲自度曲辭帝寵之可及憑恩橫甚人無敢斥遂擢爲威衛將軍曹確固爭帝不聽僖宗卽位逐之死嶺表

宋

姚鉉字寶之廬州合肥人進士爲京東轉運使徙兩浙路與知杭州薛映不協貶連州抵虔江有贛石舟行其中湍險萬狀

鉉過感而賦之雅善文詞藏書至多頗有異本雖被斥猶備夫荷擔以自隨有集曰文粹

寇準字平仲華州下邳人舉進士真宗時欲相準而患其剛直難獨任天禧中進集賢殿大學士封萊國公丁謂出準門至參政事準甚謹嘗會食中書羹汚準鬚謂起徐拂之準笑曰參政國之大臣乃為長官拂鬚耶謂愧甚猶是傾構日深會內侍都知周懷政謀作亂事連準丁謂以聞屢貶準至雷州司戶參軍未幾謂亦南竄道雷州準遣人以蒸羊逆境上謂欲見準拒絕之後卒貶所

丁謂字謂之後更字公言蘇州長洲人登進士參知政事時寇準為相尤惡之謂媒孽其過遂罷準而相謂後謂信女道士劉德妙妖誕之術坐貶崖州司戶參軍天聖中祀南郊中外意謂復還御史中丞陳炎上疏略曰丁謂陰蓄姦謀玩窺神器引巫師之妖術因魘魅於宮闈易神寢之龍岡冀消除於王氣李德裕只因朋黨不獲生還盧多遜曲事王藩更無牽復中外於茲痛憤猶積伏請更不原赦上從之謂性儉巧而善談笑在珠崖嘗問客天下州郡孰為大客曰京師也謂曰不然朝廷宰相作崖州司戶參軍則崖州為大也聞者絕倒唐介字子方江陵人擢第為殿中侍御史劾文彥博通官掖致宰相請罷之帝怒卻其奏將遠竄介徐讀畢曰臣忠憤所激鼎鑊不避何辭於謫帝益怒修起居注蔡襄趨進救之貶英州而罷彥博相又慮介或道死有殺直臣名命中使護之梅堯臣李師中皆賦詩激美由是直聲動天下士大夫稱真御史必曰唐子方而不名後召復詣闕帝慰勞之言事益無所

唐垌第進士遷太子中允將用爲諫官安石疑其輕脫背已立名不除職以本官同知諫院非故事也垌遂奏二十疏論時事皆留中不出因日扣陛請對上令諭以他日垌伏地不起乃召升殿垌至御坐前進曰臣所言皆大臣不法請對陛下一一陳之遂指笏展疏目安石曰王安石進御坐前聽劄子安石遲遲垌訶曰陛下前猶敢如此在外可知安石悚然而進垌大聲宣讀凡六十條大略以安石專作威福曾布等表裏擅權至詆爲李林甫盧杞上屢止之垌慷慨自若讀已下殿侍臣衛士相顧失色安石糾其瀆亂朝儀貶潮州別駕鄧綰申救之且自劾繆舉安石曰此素狂不足責後徙監吉州酒稅卒

顧

王鞏字定國東坡序其詩云定國以予故貶海上三年一子死貶所一子死於家定國亦幾病死

章惇字子厚建州浦城人舉甲科哲宗卽位知樞密院事與蔡確協謀朋姦報復仇怨嘗請發司馬光呂公著冢斲其棺哲宗不聽徽宗立特進封中國公爲山陵使以事累貶雷州司戶參軍初蘇轍謫雷州不許占官舍遂僦民居至是惇問舍於是民曰前蘇公來爲章丞相幾破我家今不可也

朱翌字新仲舒州人政和中登第官中書舍人以忤秦檜謫韶州晚召還卜居四門自號省事老人撰澹山集

陳鵬飛字少南永嘉人紹興中進士遂於經學秦檜子熺常從之遊在禮部時熺爲侍郎文書不應令鵬飛輒批還之熺寢不平後鵬飛爲崇政殿說書因講春秋母以子貴言公羊說

非檜怒謫惠州於舍人巷面湖築室以居吟詠自適有羅浮集行世

折彥質字仲古撫州人紹興中簽書樞密院事爲秦檜所誣謫昌化軍禮賢下士與僮寓士許廷惠輩效司馬光真率會爲鄉約五日一集太守李行中與焉嘗至廣州寓開元萬壽寺鑿井得泉甚美人號折公井

張浚字德遠漢州綿竹人唐宰相九齡弟九臯之後四歲而孤行直視端識者知爲大器第進士高宗卽位擢禮部侍郎封和國公時彗星出西方浚將極論時事恐貽母憂母訝其瘠問故浚以實對母誦其父對策之語曰臣甯言而死於斧鉞不能忍不言以負陛下浚意決乃上疏秦檜大怒謫浚連州徙永州檜死復觀文殿大學士

梁成大字謙之福州人進士素苟賤諂事史彌遠拜監察御史凡可賊害忠良者率懷背爲之坐事貶潮州竄之日朝命毀其廬雖小人如李知孝亦曰所不堪者他日與成大同傳耳張震發吳人謫南雄寓光孝寺見三松蒼翠偃蹇遂作臺登眺以舒憤鬱

計用章臨邛人以進士起家范雍辟爲通判嘗請修城壘備器械以圖討賊雍不以爲然及元昊兵圍城雍召用章問策用章曰屢獻言矣而公不用今城中老幼無辜皆陷之至此若令同爲血肉是公上負天子下負百姓雍怒拂衣起會其夜雪大作賊遂退雍挾用章陷百姓之言而誣以罪用章遂竄雷州後范仲淹經略延州知用章以忠獲罪奏雪於朝復故官

鄭俠字介夫福州福清人治平中進士調光州司法參軍熙甯六年七月不雨至七年三月人無生意俠悉繪所見爲圖奏疏詣閣門假稱密急發馬遞上之銀臺司其略云去年大蝗秋冬亢旱願陛下開倉廩賑貧乏取有司培克不道之政一切罷去冀下召和氣上應天心如陛下行臣之言十日不雨乞斬臣以正欺君之罪疏奏神宗反復觀圖長吁數四翌日命開倉免錢凡青苗方田保甲諸事悉罷之民間謹叫越三日大雨輔臣入賀帝以俠所進圖狀賞之安石上章求去外間始知所行之由羣奸切齒遂以俠付御史治其擅發馬遞罪呂惠卿鄧綰言於帝曰陛下數年成此美政天下方被其賜一旦用狂夫之言罷廢殆盡豈不惜哉相與環泣於帝前於是新法一切如故安石去惠卿執政俠又上疏論之仍取

唐魏徵姚崇宋璟李林甫盧杞傳爲兩軸題曰正直君子邪曲小人事業圖獻之惠卿奏爲謗訕議致之死帝曰俠忠誠可嘉豈宜深罪乃徙英州既至得僧屋將壓者居之英人無貧富貴賤皆加敬事遣子弟從學爲築室以遷哲宗立始得歸元符中再竄於英徽宗立赦復又爲蔡京所奪自是不復出布衣糲食屏處田野然一言一話未嘗忘君年七十九卒任伯兩字德翁眉州眉山人中進士洊擢右正言徽宗初政納用讜論伯兩首擊章惇惇貶雷州居諫省半歲所上百八疏大臣畏其多言論以少默伯兩不聽抗論愈力會黨事作削籍編管通州爲蔡卞所陷復徙昌化

陳瓘字瑩中南劍州沙縣人應舉中甲科徽宗立爲右正言以極論蔡卞章惇安惇邢恕之罪貶官明年還爲右司員外郎

兼權給事中宰相曾布使告以將卽真瓘語子正彙曰吾與
丞相議事多不合今若此是欲以官爵相餌也吾有一書論
其過將投之以決去就汝其書之正彙願得書旦持入省見
布甫就席遽出書布大怒爭辨移時瓘曰適所論者國事是
非自有公議公未可失待士禮布改容信宿出知泰州後除
名竄袁州廉州

童貫性巧媚事宮掖卽善測人主微指宣和中封廣陽郡王欽
宗受禪下詔親征金人以貫爲東京留守貫不受命而奉上
皇南巡於是議者譴起竄之英州未至數其十大罪誅之
康與之字伯可嘉興人建炎中上中興十策宰相汪黃輩不能
用與之聲名大著及秦檜當國乃附會求進擢爲臺郎於是
聲名掃地檜死坐流五羊愛白雲山麓玉虹洞幽勝築小屋

曰順菴以待遊息詩詞多傳於世

蔡確字持正泉州晉江人第進士自知制誥爲御史中丞參知
政事皆以取獄奪人位而居之士大夫交口咄罵而確自以
爲得計哲宗立爲永裕山陵使坐事奪職徙安州又徙鄧州
確在安陸嘗游車蓋亭賦詩十章知漢陽軍吳處厚上之以
爲議訕於是諫議大夫張燾范祖禹等上章乞正確罪竄之
新州

劉摯字莘老永靜東光人性峭直有氣節自初輔政至爲相修
嚴憲法辨白邪正孤立一意不受謁請然持心少恕勇於去
惡竟爲朋讒所中先是邢恕謫官永州以書抵摯摯故與恕
善答其書有永州佳處第往以俟休復之語排岸官茹東濟
傾險人也有求於摯不得見其書陰錄以示御史中丞鄭雍

侍御史楊畏二人方文章擊摯遂箋釋其語上之罷知鄆州
紹聖中陷邢恕之謗貶新州以疾卒

梁燾字況之鄆州須城人舉進士中第元豐時久旱上書論時
政不報哲宗立召爲工部郎中遷右諫議大夫前宰相蔡確
作詩怨謗與劉安世交攻之尋拜尚書右丞朋黨論起竟以
司馬光黨黜知鄆州三貶雷州別駕卒

蘇軾字子瞻眉州眉山入嘉祐二年試禮部主司歐陽修得軾
刑賞忠厚論驚喜賞第二以春秋對義居第一殿試中乙科
調福昌主簿歐陽修以才識兼茂薦之除大理評事英宗自
藩邸聞其名召入翰林王安石執政素惡其議論異已使御
史論奏其過窮治無所得軾遂請外通判杭州徙知密徐等
州時新政日下軾以詩托諷御史李定等撫其語以爲訕謗

逮赴臺獄欲寘之死神宗憐之以黃州團練使安置軾與田
父野老相從溪山間築室於東坡自號東坡居士神宗手札
移軾汝州曰蘇軾黜居思舊閱歲滋深人材實難不忍終棄
神宗崩哲宗立宣仁后臨朝累遷至翰林學士嘗鎖宿禁中
召對便殿命坐賜茶已而撤御前金蓮燭送歸院以論事爲
當軸者所恨復知杭州尋召爲吏部尚書以讒出知揚州閱
歲召遷禮部尚書兼端明殿侍讀兩學士宣仁后崩哲宗親
政乞外補知定州紹聖初御史論軾掌內制曰所作詞命譏
斥先朝遂以本官知英州貶惠州安置惠郡城西五里有白
鶴峯卜居於此淡然無所芥蒂人無賢愚皆得其懽心居三
年又貶瓊州別駕居昌化昌化故儋耳地非人所居初儋官
屋有司猶謂不可軾遂買地築室獨與幼子過著書爲樂徽

宗立移廉州改舒州徙永州更三大赦還提舉玉局觀復朝
奉郎建中靖國元年卒於常州

蘇轍字子由年十九與兄軾同登進士仁宗春秋高轍慮或倦
於勤因極言得失考官胡宿以爲不遜請黜之仁宗曰以直
言召人而以直言棄之天下其謂我何宰不得已寘之下等
神宗立青苗法行以書抵安石安石怒將加罪陳升之止之
以爲河南推官無何坐兄軾以詩得罪謫筠州監酒稅哲宗
立宣仁后臨朝遷中書舍人紹聖初哲宗起用李清臣郭潤
甫二人在外久不得志稍復言熙豐事以激怒哲宗轍極諫
落職知汝州居數月元豐諸臣皆會於朝再責知袁州又責
化州別駕雷州安置軾自惠遷儋耳與轍遇于滕郡守張逢
延入館舍禮遇有加軾將渡海逢出送於交復出官錢僦居

以館轍帥臣段諷聞之劾逢館留黨人蘇軾及爲轍賃屋等
事坐除名勒停轍移循州徽宗立徙岳州已而復大中大夫
政和二年卒

劉安世字器之魏人登進士不就選從學於司馬光光入相薦
爲秘書省正字光薨宣仁太后問可爲臺諫者呂公著以安
世對擢右正言進左諫議大夫章惇用事尤惡之三貶新州
別駕安置英州幾爲惇與蔡京所害徽宗卽位赦還初安世
除諫官未拜命入白母母曰吾聞諫官爲天子諍臣汝父平
生欲爲之而弗得汝幸居此位當捐身報國在職累年正色
立朝其面折廷諍旁侍者遠觀蓄縮悚汗目之曰殿上虎一
時無不敬懾家居未嘗有惰容久坐身不傾倚作字不草書
其忠孝正直皆則司馬光曰吾欲爲元祐全人見司馬光於

地下死後二年金人發其冢貌如生驚曰異人也爲之蓋棺
范祖禹字夢得成都華陽人進士從司馬光編修資治通鑑在
洛十五年書成光薦爲秘書省正字哲宗立除著作佐郎修
神宗實錄呂公著薨召拜右諫議大夫聞禁中覓乳媪祖禹
以帝年十四非近女色之時上疏切諫尋拜翰林學士時紹
述之論已興有相章惇意祖禹復力言惇不可用帝不聽於
是言者論祖禹修實錄詆誣又摭其諫禁中雇乳媪事連貶
永州賀州元符中移化州安置

張士良竄雷州元符中蔡京章惇等究治同文館獄將悉誅元
祐黨人專媒孽垂簾時事建言欲追廢宣仁召士良至使證
宣仁廢立意列鼎鑊刀鋸謂之曰言有卽還舊官無則死良
仰天歎曰太后不可誣天地神明不可欺也乞就戮京惇無

如之何宣仁廢立之議遂息

唐庚字子西眉州丹稜人進士張商英薦其才欲用爲諫官商
英罷相言者謂子西常宣言有一網打盡之語坐貶安置惠
州後赦歸

范坦字伯履進士累官戶部侍郎論當十及夾錫錢之弊罷之
時張商英爲相坦多與之合及商英去言者論坦助爲匱竭
之說以搖眾聽貶黃州團練安置韶州後赦復

蔡攸字居安京長子封英國公徽宗朝有寵進見無時與王黼
得預宮中秘戲淫媒謔浪以蠱帝心後坐事安置永州連徙
潯雷京死御史言攸罪不減乃父燕山之役禍及宗社驕奢
淫佚載籍所無當竄諸海島詔置萬安軍遣使誅之

朱勛蘇州人以姓名徽宗朝垂意花石勛密取浙中珍異及黃

楊三本以進帝嘉之政和中始極盛舳艫相銜於淮汴號花石綱置應奉局于蘇指取內帑動以數十百萬計延福宮艮嶽成奇卉異植充牣其中勔擢至東南部刺史所貢物豪奪於民士民家一石一木稍堪玩輒領健卒直入其家用黃封表識微不謹卽被以大不恭罪及發行必撤屋抉墻預是役者中家悉破產流毒州郡二十年方臘以誅勔爲名童貫出師承上旨盡罷去花木進奉帝又黜勔父子弟姪在職者民大悅寇平勔復得志時謂東南小朝廷帝末年益親任之一門盡爲顯官騶僕亦至金紫天下扼腕靖康之難勔欲爲自全計欽宗用御史言放歸田里言者不已竄韶州循州遣使誅之

宇文虛中字叔通成都華陽人進士爲起居舍人時金人方熾

虛中建十一策上二十議皆不納後以議和遣虛中三使金人金人解兵北去言者劾以割地議和之罪竄韶州建炎二年詔求使絕域者虛中應詔復資政大學士

李綱字伯紀邵武人政和中進士積官至殿中侍御史會京師大水綱以言事貶官復爲太常少卿時金人渝盟邊報狎至欽宗卽位李鄴使金議割地綱奏祖宗疆土不可以尺寸與人欽宗嘉納除兵部侍郎徽宗東幸宰執請上暫避敵鋒綱曰都城宗廟社稷百官萬民所在捨此欲何之乃以綱爲尙書右丞尋罷大學士陳東等詣關上書明綱無罪軍民不期而集者數十萬帝亟召綱入復爲尙書右丞眾皆奮躍金人懼乃退未幾以綱專主戰議喪師費財落職及金兵再至上悟和議之非除綱資政殿大學士綱進三疏一募兵二買馬

三幕民出財以助兵費諫議大夫宋齊愈謂張浚曰李丞相
三議無一可行者後齊愈被戮張浚爲御史因劾綱以私意
殺侍從及買馬招軍之罪有旨綱落職居鄂州移雷州居住
紹興中除觀文殿學士

李光字泰發越州上虞人登進士紹興中爲參知政事時秦檜
初定和議檜淮南守備光極言戎狄狼子野心和不可恃備
不可撤又與檜語難上前因曰秦檜之意是欲壅蔽陛下耳
目懷奸誤國不可不察檜大怒光丐去乃除資政殿學士知
紹興府尋爲方俟高所譖安置瓊州楊愿在中司復謂光作
詩諷刺時政再移謫瓊海又以仲子孟堅坐陸升之誣以私
撰國史移昌化軍三年始以郊恩復孝宗卽位諡莊簡
洪皓字光弼鄱陽人登進士擢禮部尚書爲大金通問使留北

中凡十五年忠義聞於天下至是歸見秦檜因致金酋室撚
語撚語者黏罕之左右也初黏罕行軍至淮上檜嘗爲之草
檄爲室撚所見故因皓歸寄聲秦檜意士大夫莫有知者聞
皓語憾之遂令李文會劾皓不省母出知饒州尋安置英州
趙鼎字元鎮聞喜人生四歲而孤母樊教之通經史百家之書
登崇寧五年進士歷官至宰相上嘗語張浚曰趙鼎真宰相
天使佐朕中興可謂社稷之幸也始浚薦秦檜可與共大事
鼎亦以爲言後以事爲秦檜中傷累貶至清遠軍節度使安
置潮州在潮五年中丞詹大方復誣其受賄移吉陽軍鼎謝
表曰白首何歸悵餘生之無幾丹心未泯誓九死以不移秦
檜見之曰此老倔強猶昔鼎至吉陽潛居深處無敢通問者
惟廣西帥張宗元時饋膠米檜知之命本軍月具存亡申鼎

鼎遣人語其子汾曰檜必欲殺我我死汝曹無患不爾禍及一家矣先得疾自書墓中石至是書銘旌云身騎箕尾歸天上氣作山河壯本朝遺言囑其子乞歸葬遂不食死天下悲之

胡寅字明仲安國弟之子也中宣和進士累官至侍讀直學士時秦檜當國寅乞致仕遂歸衡州檜忌寅雖告老猶憤之坐與李光書譏訕朝政安置新州寅志節豪邁謫命下即日就道在謫所著讀史管見及論語詳說行世檜死詔復其官

陳自強福州閩縣人登進士入都待銓以嘗爲韓侂胄童子師侂胄因薦其才遂登樞府侂胄姦兇久盜國柄自強實爲之表裏史彌遠建議誅侂胄以自強阿附詔籍其家竄之雷州秦觀字少游揚州高郵人少豪雋慷慨溢於文詞舉進士不中

見蘇軾於徐爲賦黃樓軾以爲有屈宋才勉以應舉爲親養始登第爲蔡州教授元祐初軾以賢良方正薦於朝除太學博士兼國史院編修官紹聖初坐黨籍出通判杭州以御史劉拯論其增損實錄貶監處州酒稅尋削秩編管橫州移雷州徽宗立召還卒於途

鄒浩字志完常州晉陵人第進士調潁昌教授呂公著范純仁皆禮遇之哲宗擢爲右正言章惇用事浩所言每觸惇忌仍上章露劾數其不忠慢上之罪未報而賢如劉氏立浩言立后以配天子安得不審因極論之帝變色猶不怒持其章躡階四顧若有所思章惇詆其狂妄乃削官羈管新州先是有田畫者志義士也元符間監廣利門與浩甚厚旣而朋黨禍熾乃謝病歸陽翟一日報立皇后劉氏畫曰鄒君不言可以

絕矣又一日浩以書約畫會穎昌中途畫亟往浩具言得罪事二人留連三日臨別浩出涕畫正色曰使君隱默官京師遇寒疾不汗五日死矣豈獨嶺海之外能死人哉願君無以此舉自滿士所當為者未止此也浩茫然自失乃別去徽宗立復為右正言

陳次升字當時興化仙游人第進士紹聖中為御史轉殿中論章惇蔡卞植黨為姦乞收還威福之柄遂為惇卞所誣謫監南安軍徽宗立召為侍御史極論惇卞曾布蔡京之惡鼠惇於雷居卞於池出京於江宜遷右諫議大夫尋除名編管循州皆以論京卞故

龔夬字彥和瀛州人清介自守有重名第進士徽宗立拜殿中侍御史始上殿即抗疏論章惇蔡卞之惡又論蔡京治文及

甫獄本以償報私仇始則上誣宣仁終則歸咎先帝願考正其實以正姦臣之罪於是三人者皆去後以論元祐后及元符后事為言者中傷詔削籍編管化州徒步適貶所持扇乞錢以自給逢赦令得歸政和元年卒

邵成章欽宗內侍也康王將即位元祐太后遣成章奉乘輿服御至南京從幸揚州金人掠陝西京東諸郡羣盜起山東黃潛善汪伯彥匿不以聞成章上疏條具潛善伯彥之罪曰必誤國帝怒除名編管南雄州侍御史馬伸言成章緣上書得罪今是何時以言為諱久之帝思成章忠直召赴行在其徒譖之遂止於洪州金人入洪聞其名訪求得之謂之曰知公忠正能事吾主可坐享富貴成章不應脅之以威亦不從金人曰忠臣也遣之金帛而去

韓紉爲澧州推官紹興九年金人歸河南陝西故地帝雖聽秦
檜和而實疑金詐未嘗弛備也紉言金人叵測上書諫和議
秦檜以爲動搖國是編管循州

楊煒越州人與李光同郡光爲參政而金人議和煒以書責光
後爲黃巖令有詆時相秦檜語除名編管萬安軍

胡銓字邦衡廬陵人從鄉先生蕭楚學春秋建炎二年高宗策
士淮海見而異之將冠多士有忌其直者移置第五兵部尙
書呂祉以賢良方正薦賜對除樞密院編修官八年秦檜決
策主和金使以詔諭江南爲名中外洶洶銓抗疏書旣上檜
以銓狂妄鼓衆詔除名編管新州新州守臣張棣許銓與客
唱酬謗誣怨望移謫吉陽軍檜死量移衡州初銓之上書也
宜興進士吳師古錄木傳之金人募其書千金其謫廣州也

朝士陳剛中以啟事爲賀其謫新州也同郡王廷珪以詩贈
行後皆爲人所訐孝宗卽位復官擢起居郎五月三日晚侍
上於後殿之內閣上曰卿流落海島二十餘年得不爲屈原
之葬魚腹者實祖宗天地留卿以輔朕也流涕答曰小臣三
遷嶺海命出虎口豈期今日再見天日乃就坐食兩味八寶
羹上曰卿向在海南爲詩必多答曰臣向居嶺海時日率作
詩十數首以此獲譴甚矣詩詞能害人也乾道七年除寶文
閣待制留經筵求去特賜通天犀帶以寵之所著易春秋周
禮禮記解詔藏秘書省

吳元美爲福建安撫使機宜紹興中其鄉人鄭瑋告元美作夏
二子傳指蚊蠅也家有潛光亭商隱堂以亭號潛光有心於
黨李堂名商隱無志於事秦檜惡之尋謫南雄卒

沈長卿舊與李光啟譏和議又與芮煜共賦牡丹詩有孟令漢社稷變作莽乾坤之句為鄰人所告紹興中編置化州

元

黃憲昭筠州人至順中累官西臺侍御史以直諫馳聲朝署會禁漢人南人不得蓄兵器犯者論死乃上疏言天生五材誰能去兵苟以南北異視人人疑懼為變非小忤旨詔安置廣州行至南雄卒

亦憐真班西夏人性剛正累官至陝西行省平章政事伯顏為相專權擅政嫉其論事不阿謫置海南伯顏敗召還

按亦憐真班一人而音譯不同耳

王仕熙字繼學北海東平人晉王朝參政致和中燕帖木兒謀逆執仕熙下獄流萬安軍郡守聞仕熙來先為營居城中及

至惡其完美乃於城西陋地茅屋借居之名曰水北新居又於西南數十步築江亭以遊息嘗作雲山辭每靜住一室屢日不出遠近皆敬愛得其文字珍藏之後得旨還復錄用忽刺出流於海南

明

周慎鄱陽人善詩與辛敬方石揚伯謙李克正查和卿等稱江西十才子洪武中為刑部尚書未視事入官舍非禮辱責胥吏上怒貶惠州府經歷比至閉戶觀書而已或言其怠職遂坐罪去

李思迪濟南人元進士遇亂晦處田野國初召起累官山西參政洪武中謫宰瓊山學博才傑廉公勤恪公餘輒歌賦自號海濱子因以名集

黃諫字廷臣臨洮蘭州人博學多藝工隸篆行草正統中第進士授編修天順初爲侍講出使安南風節凜然還遷翰林院學士石亨事敗諫以鄉人嘗出入其門被劾謫廣州通判好品泉水論郊畿玉泉爲第一京城文華殿東大庖廚井爲第一每退食內府必以廚井水烹茶連飲數杯曰暫與汝辭談者以爲佳話至廣遨遊白雲蒲澗諸山水亦評廣州水以雞爬井爲第一更名學士泉廣人多從之遊別號蘭坡至比之東坡云召還卒於梅嶺驛舍

邵銅閩縣人進士授御史以劾曹吉祥石亨諸違法事疏入帝大怒下獄榜掠備至會大風震雷拔木發屋須臾大雨雹亭吉祥家大木俱折二人亦懼掌欽天監禮部侍郎湯序本京黨亦言上天示警宜恤刑獄於是帝感悟貶銅博羅知縣有

善政

羅俊字承彥泰和人進士景泰間御史以言事謫新會典史日與諸生講解文字無事則遊山飲酒于于然不知其爲謫官也性剛不容人過人多憚之後遷仁化縣知縣升知潯州以憂去

鄒智字汝愚合州人年十二能文家貧讀書焚木葉繼晷者三年舉成化進士改庶吉士慷慨負奇其時御史湯鼎中書舍人吉人進士李文祥竝負意氣皆與之善孝宗嗣位更革弊政智喜以爲其志得行乃因星變上書劾少師安持祿怙寵少保吉附下圖上太子少保直挾詐懷奸帝得疏領之無何安直相繼罷斥而吉任寄如故銜智刺骨會劉概獄起吉使其黨魏璋入智名詔下獄謫廣東石城所吏目至廣聞陳獻

章講學新會往受業學益粹後得疾遽卒天啟初追諡忠介
李中字子庸吉水人正德進士授工部主事武宗自稱大慶法
王建寺西華門內用番僧住持廷臣莫敢言中拜官三月卽
抗疏帝怒謫廣東通衢驛丞後復官至布政使

王思字宜學正德進士改庶吉士授編修乾清宮災應詔上疏
後帝狎虎而傷閱月不視朝思復上封事疏入謫潮州三河
驛丞怡然就道夜過瀧水舟飄巨石上因坐石浩歌家人後
至聞歌聲乃棹舟以濟世宗朝召復故官

周廣字克之崑山人宏治進士歷知莆田吉水二縣以治最微
授御史疏陳四事爲當道中傷謫廣東懷遠驛丞越二年遷
建昌知縣有惠政坐誣再謫竹寨驛丞世宗卽位復官歷江
西提督學校

湯顯祖字若士臨川人少善屬文萬曆進士遷禮部主事帝以
星變嚴責言官欺蔽顯祖上言略曰言官豈盡不肖蓋陛下
威福之柄潛爲輔臣所竊故言官向背之情亦爲默移失今
不治臣謂陛下爵祿可惜人才可惜成憲可惜聖政可惜也
帝怒謫徐聞典史稍遷遂昌知縣會大計主者議黜之竟奪
官家居

程文德永康縣人由翰林編修謫信宜典史至曰余謫吏也然
世讀書興起斯文與有責焉遂遷學宮建書院復以經術誘
進諸生爲時所宗

李曰輔字元卿南昌人萬曆中舉於鄉擢南京御史時中官四
出曰輔上疏切諫帝怒謫廣東布政司照磨

許存仁名元以字行金華人許謙後爲國子祭酒十年人材進

退時政弛張無不預議皆見施行後以事為浙江僉事程孔僉所劾安置韶州既至韶居張文獻公詞好事者繪為南華謫居圖後遇赦還

江伯兒青州日照縣民母病刲脇肉以進不愈禱於岱岳願母病愈則殺子以祭已而母病愈遂殺其三歲子祭之事聞太祖怒曰父子天倫至重禮父為長子三年服今百姓乃手殺其子絕滅倫理宜亟捕治之遂逮伯兒杖百謫戍南海

李璋字德芳順天府通州人進士歷官巡撫都御史嘉靖初大獄起謫戍雷州過高要遂寓焉尋於包孝肅祠旁構小亭吟咏其間又於城西北隅構一壺亭環植花草以自娛所著有南戍稿居十餘年卒

黃直字以方金谿人嘉靖進士除漳州推官以事貶沔陽判官

外艱服闋赴部適楊名黃宗明下獄直抗疏言九經之首曰修身其中曰敬大臣體羣臣今楊名以直言寘獄非所以體羣臣黃宗明以論救與同罪非所以敬大臣帝大怒謫戍雷州衛赦還貧甚妻紡績以給朝夕直讀書自如久之卒

馮恩字子仁松江華亭人登嘉靖進士擢南京御史會彗星見詔求直言恩以天道遠人道邇乃備指大臣邪正極論大學士張孚敬方獻夫右都御史汪鋐三人之奸孚敬根本之彗也鋐復心之彗也獻夫門庭之彗也三彗不去雖欲弭災不可得已帝得疏大怒逮下錦衣將致之死長子行可年十三伏闕訟冤日夜匍匐長安街見冠蓋者過輒攀輿乞救無敢言者比朝審鋐當主筆東向坐恩獨向闕跪鋐令卒拽之西面恩起立不屈鋐曰汝屢上疏欲殺我我今先殺汝恩叱曰

聖天子在上汝為大臣欲以私怨殺言官耶且此何地而對百寮公言之何無忌憚也因歷詆其受金錢鬻官爵鉉益怒推案欲歐之恩出長安門士民觀者如堵皆歎曰是御史非但口如鐵其膝其膽其骨皆如鐵也因稱四鐵御史恩母吳氏擊登聞鼓訟冤不省又明年行可上書請代父死不許其冬事益迫行可乃刺臂血書疏自縛關下謂臣父幼而失怙祖母吳氏守節教育底於成立祖母吳年已八十餘若臣父今日死祖母吳亦必今日死臣父死臣祖母復死臣茫然一孤必不獨生通政使陳經為入奏帝覽之惻然乃遣戍雷州越六年赦還穆宗即位錄先朝直言恩年已七十餘即拜大理寺丞致仕復從有司言旌行可為孝子

廣東攷古輯要卷三十九

人物一

周

高固南海人周顯王時楚子熊商滅越而臣服之是為楚威王固以才能歸楚為威王相時魯君子左邱明因孔子史記具論其語成左氏春秋鐸椒為威王傅以王不能盡觀春秋采取成敗卒四十章為鐸氏微由固進之大都楚君至莊王最賢霸諸侯能討罪逆以服人心春秋進之子孫復能繼述以故文教日興五羊銜穀萃於楚庭南海人為畫圖以表固功公師隅粵人越王無疆為楚所敗子孫遜處南海周赧王時有自立為王者隅以無疆初避楚居東武有怪山浮來鎮壓其地因名東武山乃往相度南海將依山築南武城而越王不



果遷時三晉為魏最强越王與魏通好使隅往復南海求犀角象齒以修獻久在嶠外乃得諸琛併吳江樓船會稽竹箭獻之魏魏王乃起師奉越王往荆栖之沅湘於是南武疆土為越貢奉邑稱雄交南矣

漢

張買粵人父戊以越騎將軍與華無害從高帝定三秦有功未及封而死買少善射知書拜中大夫高后稱制丞相審食其乃言買父戊從軍時勞勩子未有食邑於是封買為南宮侯光和中粵民祠買祠曰秉正

鄭嚴田甲皆南海人武帝欲伐南越二人者首以越人歸漢帝令越人善射馳馬者選為越騎使二人將之並封歸義侯號其士卒為越王兵會東越反詔嚴與甲即以越侯兵出若耶

白沙討平之

鄧必番禺人有謀畧武帝元狩末交趾部刺史羅宏舉必茂才為屬國都尉以才能歷官日南太守卒葬馬鞍山後光武建武中馬援征交趾徵則徵貳駐兵南海開拓土宇至此每風雨晦冥聞人馬聲蹟之得必墓

楊孚字孝元南海人章帝朝舉賢良對策上第拜議郎和帝即位欲用兵匈奴孚奏言創造用武守業尚文帝嘉之時南海屬交趾部刺史夏則巡行封部冬則還天府表奏舉刺不法其後競事珍獻孚乃枚舉物性靈悟指為異品遂著南裔異物志自後羅浮瑋瑁之屬日絕世謂能通神明家在江潯南岸嘗移雒陽松栢種植宅前隆冬蜚雪盈樹人因目其鄉為河南後為臨海太守復著臨海水土記世服孚高識不徒博

雅

招猛南海人舉茂才爲郎安帝朝官大鴻臚卿掌諸侯及四方歸義蠻夷與郡國上計而諸王入朝拜諸侯嗣子禮儀皆屬焉善於其職動無遺禮南夷諸國初附及就封入覲者凡至容臺肄儀行事猛舉制詔眎之悉愜其情

陳臨字子元南海人舉孝廉順帝時官蒼梧太守民有遺腹子爲父報怨殺人者爲吏所獲臨知其無嗣令其妻侍獄中後產一男郡人歌曰蒼梧府君恩廣大能令死囚有後代德參古賢天報施其後子孫蕃盛播於嶺徼世以爲陰德所致董正字伯和番禺人少貧寒耽意術籍十五通毛詩三禮春秋子立躬耕以供父母衣食鄉閭或稍爲不善必相戒曰伯和得無入於耳否南陽隱士車遂聞其令名投道同志合之恩

如伯仲蒼梧郡張使君舉正三辟不就獻帝建安中卒

羅威字德仁番禺人天性惇愨鬢髻卽知禮讓八歲喪父哀毀如成人事母至孝遇寒常身先溫被席母乃寢夏月必撒帳而臥曰吾留蚊蚋恐去齧吾母制行雅飭先世遺負郭田力耕自給非其力不食也令異其行除吏不就居母喪結廬於墓朝夕盡哀白鹿止其墓側馴擾如家所蓄世以爲孝感所致與同邑唐頌篤行齊名王僧孺爲南海太守時下教求士有曰孝實人經則有羅威唐頌學惟業本又聞陳元士燮按陳元士燮皆以文學震一時廣之多賢由三數公者倡也

唐頌字德雅番禺人有孝行遭父母喪廬於墓左寢處其中有甘露降於塚樹馨郁霍霽彌月不己人或訪頌見白鹿拾食廬次如豢畜或異之稱唐大孝有司察孝廉任爲布山令民

感其仁無梗化者頌率民報祀之南齊永明中范雲爲廣州刺史至任首遣使祭孝子南海羅威唐頌蒼梧頓琦丁密等墓蓋以勵俗也

黃豪字子微南海人好學除外黃令約已儉節時鄰邑蝗災獨外黃無有歲屢豐稔人稱循良

何丹字伯張偵陽人成帝鴻嘉初累遷中散大夫以忤王莽出爲松滋令祥慈豈弟愛民如子有嘉禾連穎之瑞

陳元字長孫蒼梧廣信人父欽習左氏春秋元少傳父業爲之訓誥以父任爲郎建武初與桓譚杜林鄭興俱爲學者所宗時議欲立左氏傳博士范升奏左氏淺末不宜立元聞之詣闕上疏帝卒立左氏學太常選博士四人元爲第一後以病去年老卒於家子堅卿有文章

丁茂字仲慮合浦人少孤貧性至孝母終負土治墳列植松柏成行白鹿遊乎左右馴擾不去人以爲孝感時蒼梧丁密亦以孝行顯世謂丁氏多巨孝

尹牙字猛德合浦人爲郡主簿太守南陽終寵父爲張周所害憂見顏色牙乃傭僕辭至洛爲太尉養馬伺其間隙手刃張首而還事聞天子奇其才赦不問

姚文式合浦人博通今古爲交州治中時步騭爲刺史初到南海覽土地形勢歎曰斯誠海島膏腴之地宜爲都也乃問尉佗舊治處莫有知者文式因悉告之騭登望得其處立城郭建州治綏和百粵遂用安集文式之功也

鄧盛字伯直蒼梧人有孝行爲穉歸令善折獄時人語曰淑問得竟皐陶鄧盛公卿皆禮重之

頓琦字孝異蒼梧人居母喪哀毀踰制手植松柏成行感物通靈有飛鳧白鳩棲息廬側見人輒去見琦而留范雲嘗使人祭其墓

丁密字靖公蒼梧人性清介父喪廬墓側有雙鳧游廬旁小池見人馴服人謂孝感所致

吳霸字子公陽山人少以材勇為兵率鎮中宿滙浦關民感其仁號所駐山曰吳山後徙廣鬱都尉威聞夜郎遷牂牁太守為夜郎竹王立後天子從其請由是蠻裔畢服

唐珍字惠伯連州人幼聞人讀書即能記誦人謂神童及長善事父母荆州刺史度尚甚稱重之辟官太常奏請沿海立堠戍以防夷寇天子不從久病罷歸素師事郴人成武丁得黃老養生之術卒鄉人屢見其出入山水間立廟祀之號唐司

空廟子孫多有貴顯

梅鎬其先越王勾踐子孫避楚走丹陽皇鄉更姓梅因名皇鄉曰梅里周末散居沅湘及秦并六國越復稱王自臯鄉踰零陵至南海鎬從之至臺嶺家焉秦亂番禺令吳芮甚得民心號曰番君因率越人舉兵以應諸侯沛公攻南陽遇芮之將梅鎬與偕攻析酈降之以鎬有功封十萬戶為列侯鎬既受封食臺以南諸邑謂之臺侯秦亡百越皆叛鎬遂統其眾歸芮留其將庾勝兄弟居守臺嶺乃行故梅嶺又謂之大庾嶺子孫多居曲江滇陽代有顯者

李進字子賢高興人世本農家進獨涉獵經史力耕時有一雞毛色五彩倏然而來及去則莫知所往以其無主目為客雞是年禾稼大熟進得補郡功曹會荆蠻反以進為武陵太守

帥兵討破之增秩二千石賜錢二十萬中平間代賈琮為交趾刺史奏請依中州例貢士其後阮琴以茂才仕至司隸校尉交趾人材得與中州同選實自進始子孫蕃衍布在交廣高興人遂以客雜為祥比諸陳寶

吳

黃蓋南海人孫權時舉茂才為日南太守日南連年反叛頑不可治蓋思所以懲之下車以供設不豐呼主簿前數其罪搥殺之一郡大開蓋即出避討之乃定自是稍知上下之分歛手遵法後改始安太守有治聲按孫吳時有二黃蓋一泉陵人一南海人士燮字威彥蒼梧廣信人其先本魯國汶陽人至王莽之亂避地交州六世至燮燮少遊學京師事潁州劉子奇治左氏春秋察孝廉補尚書郎累官至交趾太守弟壹翦等並為列郡

雄長一州時天下喪亂道路斷絕燮每遣使詣權致雜香細葛明珠大貝不廢貢職權答慰之後拜安遠將軍封龍度亭侯卒權遣陳時代燮未至燮子徽自署交趾太守發兵拒時伏誅

李祖仁合浦人世為郡望族兄弟十人同居郡北江上事親理家並皆慈孝廉讓孫權神鳳初交州上其事詔賜爵二級郡人因名江曰慈廉

晉

王範南海人好讀書吳孫皓時閉戶不出晉平吳後刺史熊睦薦之乃以範為廣州大中正時河內司馬彪號博學嘗著九州春秋盛行於世範閱之見其畧於禮服紀錄弗精乃蒐羅百粵曲故為書名曰交廣春秋泰康中表上之訂述該覈眾

皆稱服自是名動京師交廣素缺修載自範始創為之

黃舒東莞人字展公事親至孝家貧力業以供滫瀡其所願指雖千里之外往焉父卒結廬墓側籍苦以居深野無人豺狼左右號而舒安之每夜哭聲隨悲風遠聞人為泣下母喪亦如之間里謂舒生能致養沒能致哀今之曾參也有司奏旌其門因目其居曰參里旁有山亦稱曰參里山

陶延字世賞番禺人其先家丹陽祖父基字叔先為交州刺史始夷人不識禮義基乃教以婚姻之道訓以父子之恩闔境化之留從子居廣州生延延兼文武才元帝時以戰功至伏波將軍征五溪蠻破之當論功進秩會疾卒

姚成甫番禺人以學義知名父喪哀毀成羸疾及長被辟皆不就性耽山水吳刺史陸允苦南海水鹹鹵導泉為甘溪寢溼

涸成甫復濬之郡蒙其利咸安中採菊於苜蒲澗遇一老父教之服苜蒲身遂輕健築室甘溪之上以服食自娛年八十餘卒

黃恭字義仲南海人性清潔為佐著作郎父憂去職服闋教授生徒徵辟不就乃補廣州大中正於是蒐輯王氏交廣春秋補其遺漏多所研覈

沈勁南海人家本武帥至勁讀書尚節操為中兵參軍安帝朝海寇盧循圍廣州勁帥兵出戰城陷被執循欲用之叱曰賊奴乃欲凌國士耶遂遇害後諡忠義

張魴字叔魚始興郡人涉獵經史善事父母遇旱穀食荒貴分賚貧窮鄉閭戴之咸康中為含洹縣令視民如子蔚有惠政民歌頌之有白鹿羣遊取其一以獻民因魴所築縣城及城

南岡皆以白鹿名焉

宋

周靈甫增城人慷慨知大義雄於財有家兵部曲萬餘人仕至南江督護魯國孔默之刺廣州時雅愛之其子熙先有雋才復與靈甫善後熙先謀立彭城王義康以錢六十萬使靈甫於廣州合兵靈甫知諫不從乃長往不返熙先尋就擒靈甫聞之盡散所與錢謂人曰負人之託不信敗人之事不忠遂扼腕而死

鄧魯字約子世家桂陽之韶陂里母張氏孕魯時感異徵幼爽闇有至性父思露當戍邊呼魯小字曰阿魯吾今登途矣歸期未可知也曾應聲而泣拜伏訣別如成人時甫四歲世以孝童稱之元徽中舉秀才爲郡小吏適本郡太守缺詔卽以

魯代之惠澤及民民爲立廟

齊

區金字南貴南海人事齊高帝及受禪用爲右武衛校尉後以女爲美人累擢至尹州刺史子穎亦以恩授益州刺史穎子伯虎折節讀書官至新州刺史三世刺史亦嶺海盛事也

盧度字孝章中宿人後徙始興有材畧嘗隨張永北侵魏爲魏所敗阻淮水不得過度心誓曰若得免死從今不復殺生須臾見兩楹流來接之得過後隱居廬陵西昌三顧山行事多神異世稱其有道術在中宿時棲息金芝巖有枕石至今人目爲盧公臥處

程旼義化人爲人恂悞無華性嗜書結廬江鏡環堵蕭然晏如也人服其行有不平者不詣官府輒質成於旼旼爲之辯是

非曲直咸心服而退當時化之心有愧作者望其廬輒思改
過生於南齊時歷梁陳而行誼大著於隋義寧初辛年九十
餘後人思其德名其里曰程鄉因以名縣子二長松字伯材
隱居不應薦辟次杉字仲材習靜有神異常端坐默然如泥
塑一出語輒豫知人禍福鄉氓每拜禱之壽至百餘歲

梁

譚元先南海人初名無名勇力善騎射齊末反者四起元先召
募民兵爲鄉邦衛據有番禺梁高祖興王日刺史李堅遣人
說降之高祖召見謂曰公當立勲業書彝常奈何無名乎元
先遂改名在任累著戰功加雲麾將軍

馮融番禺人北燕僞昭帝宏之裔也宏爲魏所敗竄於高麗遣
其子業以三百人浮海歸晉留番禺至孫融事梁爲羅州刺

史蠲能以禮信鎮俗汲引文華士與爲詩歌蕉荔之鄉日聞
弦誦每行部所至蠻酋焚香拜迎自是溪洞之間樂樵蘇而
不罹鋒鏑者數十年初融之蒞政也雖三世爲守牧然他鄉
羈旅號令不行乃爲其子高涼太守竇婚於郡大姓洗氏俚
人始相率受約束融所以結人心者婚洗氏之力也卒郡人
思其德祀之

陳

劉刪番禺人字正簡少篤學有志操州郡舉爲諮議侯景之亂
侯官令徐伯陽浮海南至廣州見其所爲文歎曰嶺左奇英
也後伯陽薦其詞學召至京師除臨海王長史與記室張正
見輩爲文會之友王以其才禮遇之卒於官

侯安都字成師始興曲江人世爲郡著姓父文捍少仕州郡以

忠謹稱安都工書能詩兼善騎射爲邑里雄豪侯景之亂招集兵甲至三千人高祖入援京邑安都引兵從之攻蔡路養克平侯景屢以戰功進至平南將軍世祖卽位遷司空授征北將軍討平王琳威名由是益重羣臣無出其右者又自以功安社稷漸用驕矜招聚文士褚介陰鏗等武士蕭摩訶裴子烈等賦詩馳射齋內動至千人部下將帥多不遵法世祖銜之會有稱安都謀反者世祖引安都宴嘉德殿於坐收安都乃下詔賜死年四十四

陳法念瀧水人陳光大初授南靖太守安靖郡公陳亡與馮盎力戰奮戈厲聲曰戰陣無勇非孝也遂爲盎所殺時釋其忠譚填始興人世爲郡著姓頗讀書知大義侯景之亂稍集智勇以衛都邑眾推爲戎主陳初留異叛填從侯安都討破之以

功累擢至本郡太守

隋

麥鐵杖始興人驍勇有膂力日行五百里性疏誕使酒好交遊重信義每以漁獵爲事不治產業陳大建中結聚爲盜陳亡徙居清流縣隋帝卽位遇江東反與楊素討賊每戰先登以功累遷至右屯衛大將軍帝待之密鐵杖自以荷恩深重常懷竭命之志遼東之役竟與賊戰死帝爲之流涕贈宿國公諡武烈子孟才受光祿大夫仲才季才俱正議大夫

唐

鄧文進南海人素雄於財至文進獨折節讀書以故士之流徙者競趨其門賓客至千餘人隋末盜賊滿天下文進散財集兵以赴難眾至數萬進與賊帥林士宏戰輒敗於是保有廣

韶二州歸者如市百粵之地得免兵革者文進之力也唐高祖武德五年諸賊次第納款文進遂統所部降即拜韶州刺史累立戰功每戰必身先士卒或奮臂一呼風雲變色軍中謠曰鄧守疇百夫避途言其勇也卒諡忠襄郡人爲立廟祀於樂昌

韓澄字伯源南海人曾祖瑗二原人以事爲李義府所誣貶海南子孫配廣州官奴澄生長南海勵志讀書嘗默禱於羅浮山神祈復世讐義府死始以秀才得薦官至汲郡太守累遷兵部郎中巡歷至義府墓私發其尸鞭而刑之以報不共戴天之恨人皆義之

蘇妙字觀妙南海人其先家本雍州武功父義爲京兆少尹始徙廣州妙幼奇穎讀書通大義累官至泉州刺史有惠政行

春門樓有白雀來巢見妙出每飛集車蓋上泉民歌頌之

韋善道字守約南海人代爲郡著姓博學能詩少作縣吏節度使張九章與語奇之俾佐書記後官至郴州太守有訟鵝者問其所飼甲云稻穀乙云糠飯叱而留之明日視遺矢有芒殼召甲歸之人服其明子八長注遯蹟不仕第七子滂爲象州刺史曾元累葉不應辟舉號韋隱居家許渾有詩

盧宗回字望淵南海人進士官集賢校理聞父有疾歸嘗遇長安有題慈恩寺塔詩人愛誦之爲刻木榜

李文儒字元質南海人少以詞翰知名元和中應湖南徵辟道樂昌遊泐溪石室眾推作記揮毫立成見者駭服罹憂東歸帥府孔戣甚重之會韓愈謫潮州請於戣加優禮月給送使錢愈遜謝不受時論兩稱其賢後在湖南以侍御史充節度

判官江陵有兄弟甲科者召譙固辭帥譙其傲慕客不能終
篇文儒為足之曰韓韓棣華異有懷而靡及幡幡瓠葉同式
飲以庶幾謂其非奉使也其人謝過成禮而去帥大悅太和
中遷明州刺史地瀕海每番航至商賈雜湊豫行禁令民夷
不犯罷歸家徒壁立孫休亦好學有祖風

區册南海人系區治子之後喜讀書家徒壁立下筆為詞章千
百言滾滾不休自郡守以下皆重其文采貞元中韓愈貶陽
山令册冒險往陽山師愈亟加稱許及歸送之以序其見重
如此時又有區宏者亦遊愈門愈有送宏南歸詩張籍亦有
詩送宏丹陽洪興祖謂宏即册然其始末不類或其族人也
鄭愚番禺人家世殷富愚幼穎力學嘗作詩云臺山初罷霧岐
海正分流漁浦颺來笛鴻逵翼去舟隱然有濟川之志識者

知其公輔器文宗朝舉進士累官至禮部侍郎拜尚書左僕
射初蒞桂時同平章事魏公崔鉉在荆南愚以鉉負海內重
望乃袖文卷著錦半臂謁之愚出鉉閱其所業歎賞至再曰
真銷得錦半臂也

鄧承勳南海人績學登進士節度使柳玭甚重之錄其家範以
教子孫

邵謁清遠人後徙翁源家焉善吟詠家貧屈為縣吏令有客至
目使搢牀者三謁不應令怒謁瞪目視曰咄吏豈供汝搢牀
者耶因發憤讀書久之學成為有司所舉抵京師隸籍太學
聲華奕奕然剛燥與時戾以是竟不第甲科

楊環南海人力學工詩隱居羅浮咸通末登進士初任省時夢
登高臺耘草得玉麟及除宏文館校書郎人賀曰子居是職

所謂麟芝閣也始悟所夢後以時事日非拂衣歸隱又有章
隱居者家於朝臺往來羅浮與環莫逆人稱曰南濱三隱
何鼎其先曲江人後徙番禺少聰悟日記萬言宣宗朝進士累
官至容管經畧使時承亂後鼎加意招徠賴以安堵峒賊梁
宗叛鼎單車往說之宗即率眾歸耕終鼎之任無胠篋盜倉
鼎小疾民有燃指禮佛爲之禱者善星厯知唐室將亂朱全
忠兇惡類祿山必有慶緒之禍誠諸子無事全忠後一如所
言

章昌明循州龍川人家素饒富勵志讀書工詩律詞賦長慶中
進士及第嘗上書宰相李吉甫責以協恭和衷之義吉甫重
之累官秘書丞秘書清華之職自吳郡張率之後東南胄緒
未有任者昌明耽閱麟署慣乘鹿車雖荀勗之注寫竹書薛

夏之移坐南閣莫能過也後卒於官

鄭隱其先閩人徙居循陽咸通末小魏公崔沆自闕下黜循州
佐隱贊謁之一見甚慰自是日與之遊隱年少懶於事傲忽
循之官僚遂犯眾怒門吏家僕無不厭惡往往呼爲乞索兒
未幾沆以恩還京命隱偕行在京骨肉聞沆攜隱皆以書止
之沆不能捨尋詔沆知貢舉沆令隱就策試曰鄭隱崔沆不
與了更有何人肯與之一舉及第後竟爲人所鳩

陳元光揭陽人父政以武功著元光明習韜鈴善用兵有父風
累官鷹揚衛將軍永隆二年盜攻南海元光提兵深入俘馘
萬計嶺表悉平還軍於漳奏請創置漳州謂周官七閩宜增
爲八詔從之就命元光鎮撫後殘黨復熾元光戰歿事聞上
旌其忠諡昭烈

趙德海陽縣人進士元和間韓愈刺潮稱德沈雅專靜頗通經
有文章可以爲師延德攝海陽尉勾當州學事及愈改袁州
欲攜與俱謝弗往愈高其操賦詩爲別有婆娑海水南簞弄
明月珠之句又以平生所作文授之德讀而序之曰昌黎公
聖人之徒歟其文高出與古之遺文不相上下學者稱爲天
水先生

陳頴德慶人少讀書通達權變隋末馮盎調兵端溪頴率眾赴
之盎後歸唐頴亦至長安與燕賚慙勤白二州所至輯綏功
多進奮武將軍卒鄉人卽所居立祠祀之扁曰興化

莫宣卿字仲節封川開建人父讓仁有隱德宣卿早孤受母訓
幼卽雋拔稱神童一日與羣兒戲沙中題詩曰我本南山鳳
豈同凡鳥羣人大奇之比長構書屋於麒麟山下奮志讀書

唐大中五年進士第一授台州別駕以母老乞歸養賜其鄉
曰錦衣有莫狀元讀書堂及片玉亭狀元并狀元祠狀元書
院龍吟水廣南大魁天下實自宣卿始

陳萬言封川人僖宗朝進士爲歙州刺史明恤民隱時稱能吏
晚歸隱漁村苦刻作詩人甚稱之

李謹微康州人天祐進士授番禺令之任夜泊三洲月高作歌
吟聲有漁父擊舟而來長揖曰適聞子吟嘯有觀國之志偶
就子曾世將亂矣宜高尚雲林言訖不見謹微悟遂隱不仕
馮盎高州良德人累代爲本部大首領盎少有武畧隋開皇中
爲宋康令五州僚叛盎馳至京請討之文帝敕左僕射楊素
與盎論賊形勢素曰不意蠻夷中有此人大可奇也卽令盎
發兵擊之嶺外遂定或說盎曰公克平五嶺二十餘州豈與

趙佗相比請上南越王之號盜不從遂以南越之眾降高祖封耿國公奴婢至萬餘人所居地方二千里子三十人智戴最知名

甯原悌欽江人刺史純從孫也純能以詩書禮義教其族人原悌少好學武后永昌元年舉進士以賢良策試於廷原悌第九原悌出荒服得上第朝野咸歎異之累官至諫議大夫以言事忤旨去官卒葬於大帽山宋之間有送甯諫議詩

姜公輔愛州日南人登進士第為校書郎應制策科高等召入翰林為學士累官諫議大夫同中書門下平章事從幸山南車駕至城固縣唐安公主薨上悲悼詔所司厚其葬禮公輔諫曰非久克復京城公主必須歸葬今於行路且宜儉薄德宗怒罷為左庶子尋丁母憂順宗立起為吉州刺史卒

陳集原隴州開陽人有孝行喪父嘔血數升枕服苦廬悲感行路資財田宅及僮僕並以讓兄弟則天時官至左豹韜衛將軍

區澤字伯仁連州桂陽人好學修行為鄉閭所推重州近荆衡多流徙招集至門擇其智勇編為什伍使衛鄉閭煬帝大業中拜澤為熙平郡守盜賊蜂起大江以南日夕倂擾澤練集家兵以遏要路益不入境會唐高祖代隋澤舉郡歸附荆粵得免於兵革之患澤之功也天下甫定澤謝事不受唐官爵士論高之卒民立祠祀號區太守廟時有區世畧亦州人隋亡籍其境土歸唐唐以為本州刺史卒人德之亦廟祀焉何昌期陽山人有膂力能挽二石弓以是知名天寶中安祿山叛朝廷詔下郡邑求武士昌期與同里李玉珪應募郡守試

之踢張超距加人一等乃送隸元戎帳下爲裨將大敗賊帥高秀崑祿山之破自秀崑之敗始也有司上其功上甚嘉之封甯國伯軍中目爲何十萬言其材勇足十萬人敵也玉珪字少襟爲鄆子儀部將平安史復兩京與有力焉官至右衛將軍卒鄉人廟祀之

劉瞻字幾之其先彭城人徙桂陽有文學才思豐敏大中初進士擢第累官至大學士同昌公主薨懿宗尤嗟惜之以翰林醫官韓宗紹等用藥無效收之下獄兩家宗族枝蔓盡捕三百餘人瞻詔諫官令上疏無敢極言瞻乃自上疏帝大怒卽日罷瞻相又爲路巖韋保衡所譖斥廉州刺史僖宗立召復居位三月卒弟助字元德喜黃老子曰滉曰涉曰延賞渭南尉右拾遺

張宏雅始與曲江人其先家范陽方城曾祖守禮祖君政父子虔高宗顯慶四年嶺南帥府舉宏雅明經塢帖皆中首得及第粵俗自是靈靈多經學士矣弟宏矩宏載宏顯均顯貴張九齡字子壽一名博物曾祖君政詔州別駕因家始興爲曲江人父宏愈九齡幼聰敏善屬文年十三以書干廣州刺史王方慶大嗟賞之曰此子必能致遠登進士授右拾遺出爲冀州刺史以母老固請換江南一州得數承母音耗改爲洪州都督張說知集賢院事嘗薦九齡堪爲學士說卒上思其言拜中書侍郎同中書門下平章事封始興縣伯李林甫無學術以九齡文行爲上所知己之乃引牛仙客知政事九齡屢言不可帝不悅罷知政事後宰執每薦引公卿上必問風度得如九齡否故事皆措笏於帶而後乘馬九齡體羸常使

人持之因設笏囊笏囊之設自九齡始也爲相時薦長安尉周子諒爲御史子諒以妄陳休咎獲罪九齡坐引非其人左遷俄請歸拜墓疾卒年六十八諡文憲子極伊闕令祿山之亂陷賊不受僞命詔加太子太贊善弟九臯九章均爲刺史初九齡爲中書令天長節百僚上壽多獻珍異唯九齡進金鏡錄五卷言前古興廢之道上賞異之

張九臯九齡之弟弱冠舉孝廉嶺南按察使裴由先求賢推爲南海令司戶叅軍進始安太守罹母憂兄弟俱苦塊盡哀勺飲不納每行哭則畜犬隨號且有白雀馴狎之祥鄉閭異之服闋遷襄陽太守累有政績詔書褒異封南康縣開國男秩滿遷殿中監入朝委辦服御器用勤勞成疾卒年六十六子九人捷擢撫抗捍均顯貴拱哲挾援不仕

張九章九齡九臯弟天性孝友嘗與兄泛海各在一舟風濤大起自分同沒中宵漂汨明發各在津亭餘舟鮮有存者人以此占其他日必貴始仕廣州南海令累遷至嶺南經畧節度使好爲民興利務在富之百姓歸心

張仲方始興人祖九臯父抗仲方貞元中進士釋褐集賢校理累官至京兆尹封曲江縣開國伯貞確自立綽有祖風爲度支郎中時太常定李吉甫諡仲方駁之後爲李德裕之黨擯斥坎坷而沒人士悲之

張採九章八子奕世顯仕至採以明經仕至雷州刺史泣事實宏甚有惠政

五代楚

鄧恂美連州人有敏才工詩賦時湖南朱昂博學號朱萬卷士

類無當意者獨推遜恂美唐天祐中與孟賓于並爲李若虛
薦入洛陽擢進士登第後還家爲湖南節度使周行逢所留
辟爲館驛巡官置幕下恂美背偃時謂之鄧馱子性頗迂如
其形眾多不悅之者行逢因此禮待日薄同年少保王溥爲
相聞恂美不得志寄以詩云綵衣我已登黃閣白社君猶窘
故廬南望荆門千里外暮雲重疊滿晴虛自是行逢稍優禮
之未幾翰林學士李昉至亦恂美同年也召至傳舍相見話
舊不覺號慟行逢疑其泄已陰事呵責之黜爲易俗場官使
人詐爲山賊入官署殺之聞者無不慟惜後李昉再銜命至
南嶽知恂美墳在近徒步百里爲詩哭之古人布衣交未有
若昉者也五代時湖湘號多詩人譚用之廖允圖爲之冠連
郡名士又不特恂美先恂美者有黃匪躬後恂美者有陳用

拙胡君昉皆負詩名

石文德連州人少志學一覽不忘弱冠讀范奕漢書摘其瑕璽
數百條爲之辨駁先達見之曰公羊墨守不能過也游湘漢
間無所知名僦屋長沙遇天策府學士桂陽劉昭禹與語大
見稱許會端午文德賦艾虎長句昭禹驚曰子文苑之雄也
言諸楚王馬希範得隸詞學秦夫人卒王命中外有文學者
爲挽歌文德詩有云月沈湘浦冷花謝漢宮秋王大異之評
爲第一未幾授水部員外郎會燕常春堂希範出玉杯爲賦
詩者賞李臯詩先成得之文德繼進乃更盡美王復齊以玉
蟾滴由是諸學士多嫉其能出爲融州副使蓋入譖者之言
也希範性汰侈營建征討無虛日文德上書切諫希範怒會
文德卒乃免譴

後唐

何澤廣州人鼎之子少好學長於歌詩舉進士為洛陽令唐莊宗好畋獵數踐民田澤乃潛身伏草間伺莊宗當馬諫曰陛下未能一天下以休兵而暴斂疲民以給軍食今田將熟奈何恣遊畋以害多稼莊宗大笑為之止獵拜倉部郎中明宗時數上書言事謂置太子侍讀士論韙之澤外雖直言內實邪佞後為宰相趙鳳所譖致仕

孟賓于字國儀連州人少聰穎遊鄉校力學不怠父以家貧且賓于無他兄弟力止之父題壁曰他家養兒三四五我家養兒獨且苦賓于從鄉校歸續曰眾星不如孤月明牛羊滿山畏獨虎父奇其志晉高祖朝登進士仕湖南能詩有盛唐風致工部侍郎李若虛廉察沅湘日賓于以詩數百篇號金鰲

集獻之大為稱賞與李昉為同年進士甚友善後昉仕宋官翰林而賓于猶為南唐郎官寄賓于詩曰初攜寶劍別湘潭金榜標名第十三昔日聲名喧洛下只今詩句滿江南蓋惜其不顯榮也後歸老於鄉隱玉笥山號羣玉峯叟年八十卒賓于以詩名為世所重陳堯佐序其金鰲集有云五代詩人以來未有過賓于者也

南漢

簡文會南海人幼穎攻書善詩律南漢高祖劉龔開進士科擢第一及第累官尚書右丞逮事中宗劉晟諫其暴酷謫禎州刺史盡心民事卒於官所居鄉號魁岡有簡狀元井

王詡南海人乾亨初舉進士拜中書舍人會白龍見南宮詡進白龍頌文采斐然大有七年昭賜殿成詡又著昭陽殿賦上

之時獻賦者數十百人詡爲第一每賜予稍緩必揚言曰吾賦字字作金聲何受賜之晚也其自負如此

鍾允章其先邕州人後徙家番禺博學瞻文辭高祖時設科取士允章以進士及第累遷至中書舍人尤爲中宗晟所知凡誥敕碑記多命屬草有司奏允章名儒爲儲君輔導晟命教長子衛王繼興晟卒繼興卽位更名鋹鋹性愚委政宦官允章叅政嫉之數請誅宦官宦官皆仄目會祀南郊允章與禮官登壇指麾宦者許彥真見之誣其謀反下獄鋹遣尙書薛用丕治之允章與用丕有舊因泣曰吾受誣以死二子皆幼不知父冤及長公可告之彥真聞之罵曰反賊欲使其子報仇耶乃白鋹並捕二子族誅之是日天色慘黯道路以允章素忠鯁皆爲掩涕弟有章有文學官翰林學士

植廷曉東莞人爲南漢將見鋹暴日甚解兵柄去宋開寶中太祖遣潘美伐漢鋹顧諸將無可使者始起廷曉爲大將統軍六萬屯馬逕以禦宋師力戰不勝死於陣南漢之亡以戰而死獨於廷曉有取焉

陸光圖四會人生長華胄讀書知大義仕至閤門副使劉鋹時出爲郴州刺史周恤窮民招輯兵事境賴以安民呼陸父大寶中宋師來伐光圖遣兵柵騎田嶺爲潘美所破被執不屈死鋹遂亡國光圖有故吏龐姓者嘗奏事見鋹鋹識之及鋹降潘美過騎田嶺龐來迎鋹驚曰爾亦在此耶謝翺嘗作邸吏見故主曲

陳拙字用拙以字顯連州人少習禮樂明悟音律尤長於詩登臨湟樓賦詩云浮世自無間日月高樓長有好山川送長沙

使君末云人說洞庭波浪惡使君身是濟川舟人傳誦之唐
天祐元年進士授著作郎見朱温弒逆南歸謁清海軍節度
使劉隱隱與語大悅遂留用之未幾隱薨弟巖襲其位稱南
漢用為吏部郎中知制誥卒著有大唐正聲琴籍為知音者
所秘不傳

黃損字益之連州人少慷慨有大志築室於靜福山扁之曰天
衢讀書其中罕與浮俗接以博學績文聞於時尤善為詩宜
春鄭谷為湖海騷人所宗一見亟稱揚之舉其詩數聯謂曰
君殆奪真宰所有也後仕南漢主龔累遷至尚書左僕射會
龔建南薰殿務極功巧損進諫龔不悅無何嬰足疾退居永
州北滄塘湖上詩酒自娛病卒

陳代仁里人鬻薪自給以養其親一日遇道士於嶺上奕棊賜

以一桃又與一盒封識甚固令作肆市卦休咎百中後棲白
鶴山不知所終

楊洞潛字昭元始興人少好經史有權畧劉隱薦為清海建武
節度判官嘗為隱畫策取湖南容管及巖繼立洞潛首言刺
史不宜用武夫巖從之由是名流畢集選任得宜嶺表大治
擢洞潛為兵部侍郎同平章事洞潛以梁使趙光裔乃宰相
光逢弟遜使位居已上巖從之立學校開選舉定制度皆出
洞潛規畫後謝病歸卒梁唐之世天下大亂而嶺南少康民
不受兵洞潛與光裔之力也

宋

馮元字道宗南海人幼從崔頤正孫奭為五經大義方讀易每
夜夢異人以紺蓮華與吞之且曰善讀此必顯貴與樂安孫

質吳陸參譙夏侯圭善號四友大中祥符進士時詔流內銓
取明經者補學官元自薦通五經補國子監直講書王旦聞
其名薦之眞宗試進士殿中召元講易帝悅遷太子中允直
龍圖閣詔預內朝直龍圖閣預內朝自此始仁宗卽位遷禮
部郎中同知貢舉預修三朝正史爲翰林學士凡三禁職皆
天下選而元兼有士林榮之後遷戶部侍郎足疾氣愕卒年
六十三贈本部尙書諡章靖著述甚多皆未成書家人攜其
遺文得數百篇詩百餘章宋祁稱其清緻平粹類其爲人
丁玉甫番禺人少有才名讀書明經遠近受業者羅屨於外元
豐中舉進士累官朝議郎以言事爲當國者所惡出爲桂州
學教授轉朝散大夫性廉潔與物無忤知廣州蔣之奇重之
嘗謂人曰景有沈珠浦人有丁玉甫吾來嶺外甚無聊所愛

者特此而已

霍暉字明甫南海人篤志問學仁宗皇祐間新會龍山之水色
變而爲紫者旬日人皆以爲瑞暉曰清者水之眞體也變而
爲紫非正色也其必水之怪乎水陰物也陰之類爲小人爲
盜賊今水失其常性吾恐其關於國家者大也後蔡京童貫
輩當國有金人之變皆如暉言哲宗朝詔舉八行人以暉應
命官終海豐縣尉時東莞王知亦有學行同預是科廣之士
以八行著者暉暨知二人而已

黃洞字明達南海人博學能文舉於鄉不得雋蔣之奇知廣州
下車聞洞名與之唱酬自以爲不及紹聖中蘇軾謫惠州洞
又與軾遊嘗同軾登鑿空閣賦詩元符三年軾被命北還洞
與吳復古何崇道李公弼等自番禺追餞至清遠峽同遊廣

慶寺而後返

張書言番禺水西人博學有令譽哲宗朝舉進士累官瓊管安撫大使所至有惠政嘗立弓箭社不論家業高下戶出一人乃自相推擇家資武藝為眾所服者為社頭次為社副有警即率弓箭手以備戰峒俚畏之兄書行官至朝列大夫兄弟蟬聯為一時衣冠之望

梁觀國字賓卿廣州人志行純懿再薦於鄉不第乃取所作科舉文畀諸火以自治身心一言一動必求與古人合尤病憊邪而重忠義每朝廷貶謫正人至廣必求見焉蘇軾父子以文名天下學者家傳人誦獨觀國謂其雜以禪學飾以縱橫非有道者之言遊其門者稱為歸正先生卒其所遺書真德秀王應麟輩皆稱之

黃勳字有功南海人幼有至性每讀書思無燈乃取烏柏子或柚子仁榨為油人多效之借人書於斷缺處留意補緝士故樂假之母沒家貧無以為葬或議火之勳哭曰吾母何罪而罹焚烙之酷乎乃為人傭書得錢以葬高宗朝登進士始授永福丞辨決獄囚代民還積逋民稱為再生父久之進朝散郎知雷州所至有聲當時號循吏

孔元勳番禺人父粹神宗朝進士知封州以善政聞元勳能文章工詩紹興初進士凡四任學官轉朝散大夫知新州撫字有聲未及大用卒弟元凱亦有行鄉人以其父子兄弟皆賢名其鄉曰慕德里

吳羣字無黨番禺人紹興中進士通判瓊州所至有聲先是同邑李諤為瓊州安撫亦有善政羣至弭盜郵民政聲與諤埒

瓊人歌之曰前有李君今見吳瓊管保障皆番禺民之父母
邦之樞羣允廉愼未嘗一介取於民子純臣四握州麾口不
言錢爲崔與之鄒應龍稱重

陳康延字元舉番禺人高宗朝進士三任學官兩歷邑令後除
梅州到郡爲民興利除害民賴以安家居不務華飾僅有田
五十畝其清白如此

馬持國字鯁臣南渡入嶺遂居新會以策干督府張浚浚置之
幕下不合去執政王淮龔茂良等薦之補嘉州文學紹熙中
中判欽州不貿交貨遠近退龔欽人爲立祠知容州政務寬
厚遠人懷之又相與祠於五賢堂卒年八十餘持國有大志
每語及恢復輒泣下子晞驥最知名

馬晞驥持國長子孝宗朝進士初調六安善決獄人稱神明改

知衡山爲政公廉後判肇慶或以奇硯晞驥却之由是名
節益著子宜祖知英德府三世太守亦一門盛事也

陳儻東莞人以好善稱六子皆克自樹立子孫蕃盛衣冠人物
爲邑之最

簡克己南海人少習舉業己而厭之遠遊湖湘師事張栻數年
講性理之學以真知實踐爲事栻稱其精確有守退歸杜門
不妄與人交崔與之自倅邕泊被召往來謁見皆執弟子禮
廖德明帥廣日延至郡齋講論舊學每諦聽必拱立其爲名
流所重如此

陳去華南海人嘗遊象山陸九淵之門與九淵論吾與點也一
段九淵喜之去華自是益有省悟別後謂人曰去華方是一
學者

譚凱南海人有學行崔與之薦於廣帥楊長孺長孺亟往見之
尊為學老日南至長孺詣學謁先師畢命兩吏掖凱以進拜
之既而貳車以下皆拜其為時所重如此後有南海林橐者
以靜修聞廣帥方大琮初行鄉飲禮請以為大賓時年九十
四威儀可則終席無倦容大琮稱為衛武公之流大琮又建
濂泉書院落成謀於文溪李昂英求元老以首席昂英答曰
是邦老成無如田知白大琮躬詣之知白以病辭再往則遁
矣皆一時耆老也

曾槐字仲卿番禺人善屬文弟機亦力學適大比兄弟聯薦紹
熙中舉進士知歸善縣廣帥張釜薦之曰文學行義斗南一
人未幾知桂陽軍有善政調漢陽軍乞歸自號省齋有省齋
文集行世

韓經增城人家於韓唐村蚤喪父與弟緯力田養母孝友著聞
母喪廬墓側素食不進鹽酪凡三年天感其孝一日風雨晝
冥飛錢數萬入其宅田是家裕世稱韓孝子

鄭漢章南海倫教人慶元間為萬安主簿時佞胃柄朝紀綱叢
隳漢章曰吾聞貞士不處亂以自污哲人當見幾以遠禍弗
去何為遂棄官南歸嘗遊蒲澗拾遺金二百餘候之亡金郎
果至盡舉而還焉

崔與之字正子增城人其先世汴人父世明試有司連黜每曰
不為宰相則為良醫遂究心岐黃之書貧者療之不受直母
羅氏露坐有星墮懷而生與之幼名星郎早孤家貧苦學少
卓犖有奇節不遠數千里游太學紹興四年舉進士廣之士
繇太學取科第自與之始授潯州司法叅軍累官至大學士

提點廣西刑獄時浮海巡宋崖革除弊政瓊人次其事為海上澄清錄嶺海去天萬里用刑慘酷貪吏厲民乃疏為十事一獄因充斥之弊二鞫勘不法之弊三死囚冤枉之弊四贓物供攤之弊五戶長科役不均六弓手土軍騷擾七催科泛追八緝捕生事九奸猾健訟十州縣病民高惟肖常刻之號嶺海便民榜廣舶趙汝楷見之服為吏師後以煥章閣待制知成都府本路安撫使凡蜀知名之士若蒙大酉李性傳李心傳度正之徒皆薦達之拔擢尤多若魏了翁李庭芝劉克莊李鼎王應辰魏文翁王子由蘇植輩各以道德文學表表於世未幾召為禮部尚書不拜便道還廣蜀人思之肖其像於成都仙遊閣以配張詠趙抃名三賢祠理宗即位致仕薨年八十二諡清獻遺戒不得作佛事子璩嘗以賢良徵將授

以官固辭而歸論者高之與之躋仕四十七年未嘗一玷彈墨愛韓琦寒花晚節之句築菊坡以自適復以名其居理宗思其風烈嘉歎久之大書菊坡二字賜其家有文集若干卷蒙大酉書其端以為白麻不起千載一人

吳英南海人生而魁梧有謀畧嘉泰中海寇竊發有司募人捕之英往應命乃設伏要害處出其不意擒獲無算特授承信郎累建奇績寶慶初上賜御筆獎之英感奮淮口之役躬冒矢石連獲大捷以功轉左武大夫防禦使平居有馳騁伊吾之志每聞和議成輒眠食不安後卒於家子三長宗道知賓州次宗達宗遇俱授武職

楊汪中字季子番禺人幼孤篤志好學嘉定中舉進士調靜江民曹端平中改肇慶府推官家居需次摧鋒戍卒于紀晝薄

城下居民大恐汪中有縋城諭賊功銓部最之遂知廬陵縣為政多所建白後官至奉議郎

吳文震字鉉發番禺人理宗朝進士初試鬱林民曹權幸有政聲後知歸善縣行鄉飲崇禮教絃歌藹然大興文治尋倅欽州又攝守春陵皆有惠政

溫若春番禺人力學有孝行舉進士除校書郎崔與之素重其學行思薦達之奏對間一日上問曰卿鄉里有何人才與之奏曰吳純臣有監司之才溫若春宜清要之任於是除秘書郎後致仕

劉鎮字叔安南海人兄弟三人能文有孝行嘉泰中進士以註誤謫居三山白號隨如學者稱為隨如先生仲弟鎔季弟鐸俱進士邦人榮之贈以詩曰三子皆黃甲一門無白丁有司

名其所居曰叢桂里嘗與崔與之交遊與之薨弔以詩有曰始終無玷缺出處最光明人指以為實錄

趙崇模番禺人知安化有善政秩滿將代後圃桃梅並實池蓮一本雙葩人咸異之後祀名宦

翟傑東莞人登紹興進士散孝友講道學人皆稱為有道君子任化州司戶構桂華書院偕英俊講學窮經後邑令陳琦建思賢堂祀傑及同邑陳謨陳慥邑人祁順詩曰卓哉三夫子才名重一鄉

李昂英字俊明番禺人母黎氏將誕夢大星降於庭因名少雋穎書一覽成誦崔與之深器重焉理宗朝薦於鄉明年試春官擢第三粵中士探花自昂英始初調汀州推官累遷至太學博士賜對上奏劄上喜其直書御屏記姓名擢右正言尋

以論史高之奸邪不合旨退歸諸生以詩餞諸國門外有庾嶺梅花清似玉一番香要一番寒之句父老爭持彩幟郊迎焉時趙汝騰有三老八士之薦三老李韶陳愷徐清叟八士昂英其一所謂國之干將莫邪者也家食數載杜門卻掃久之上思其賢起家除江西提刑洗冤澤物寶祐二年被召除大宗正卿上疏論時事上嘉納擢吏部侍郎封番禺開國男與御史洪天錫論董廬二巨閹竊弄威福疏人不報解職去有詔除端明殿學士不赴自是無復仕進意家文溪之上因以自號上嘗賜其所居扁曰久遠曰文溪曰嚮陽堂一夕大星隕舍東後數日昂英卒年五十七諡忠簡子三志道最知名

錢益東莞人刻苦讀書理宗朝登進士性剛介不可干以私累

官靖江府簽判盡心獄訟甚有德政民呼曰錢佛子

郭聞字開先番禺人理宗朝進士調真陽尉擢監察御史知無不言糾正奸邪與利除害民作感恩齋以報之卒與菊坡文溪合祠

李用字叔大東莞人少孤事母極孝初業科舉及讀周程諸書潛心理學從遊者館無虛日自號竹隱人稱竹隱先生李昂英聞其賢就見之曰吾今乃見有道君子授校書郎不受卒八十一理宗特賜竹隱精舍扁以表之子春叟字子先有學術爲肇慶府司理嘗辯冤獄後歸以經史學訓後生朝廷敬其名賜號梅外處士卒邑人繪像祀於竹隱祠

趙必瑒字玉淵號秋曉東莞人父崇誦度宗時同科喬梓聯登修爲盛事必瑒初任高要簿尉文天祥開督府於潮惠時辟

爲朝散郎相與殫謀恢復而勢已不支宋亡隱居東莞之温塘以詩酒自娛嘗題其室曰詩人只合住茅屋天下未嘗無菜羹其所養可知矣

陳庚字南金東莞人父益新邃性理之學邑人尊之曰東湖先生庚其長子擢鄉貢進士以世亂無求仕志隱居東湖研心道學人尊之曰月橋先生弟紀字景元亦隱於家以賦詠自娛號淡軒先生

張鎮孫番禺人少苦讀博學強記度宗朝進士廷對爲天下第一先是童謠曰河南人見面廣州狀元見河南有司因構見面亭以俟之文溪李昂英未達時讀書海珠嘗與同志數人結龍頭會有夢鸞長弓射江江爲竭者昂英占之曰應是讖者其張氏子乎後鎮孫果爲狀元其年大江忽竭往來相通

企望能辨眉目人始悟所謂見面之說宋末通判婺州會元兵至鎮孫遂奉二親歸廣時端宗航海幸閩廣間廣州海上軍潰奉鎮孫爲帥鎮孫與都統凌震結集行伍誓圖恢復而力不支死於大庾嶺

陳大震字希聲番禺人理宗寶祐進士度宗時權知雷州在郡二年判語數百人刻之號蘧翁山判會元兵至誓與城存亡而力不支遂歸番禺飲酒賦詩自號蘧覺先生卒年八十石文光增城人有智勇宋末盜賊蜂起民賴其捍禦之力旣沒立廟號爲石神

馬南寶香山人家饒財讀書好義尤工詩宋景炎二年端宗自潮州之淺灣航海避敵過邑境南寶獻粟千石以餉軍勅獎之召拜權工部侍郎時帝舟爲元帥所迫丞相陳宜中張世

傑等奉帝幸沙衝暫宮於南寶家南寶竭力保衛元人無知者帝舟將復駐淺灣未至元兵來襲世傑等奉帝舟退保秀山遇颶風幾溺帝遂得驚悸疾後崩於化州之硃洲衛王昺即位走厓山南寶方赴厓山會病阻宋亡南寶逃匿已而聞陳宜中奉帝昺猶在占城南寶起兵運糧往迎車駕爲元人所執不屈死嘗作詩有曰日擊崖門天地改寸心難與夜潮消又曰眾星耿耿滄溟底恨不同歸一少微聞者哀之黃俊南海人沈重有謀宋末爲摧鋒軍將性剛毅元兵陷廣州授陳實謝賢官俊拒不受實賢等害之伍隆起新會人三世事宋帝昺舟次厓山時隆起率鄉民爲義兵捍衛且貢米七百石元帥張宏範入廣州民咸附之隆起力戰累日不沮潛爲其下謝文子所害

熊飛東莞榴花村人有武畧元軍陷廣州飛起兵應趙潛破之潛遂入廣州元將呂師夔將兵渡梅嶺潛遣飛禦之於南雄戰敗赴水死所居銅嶺去城十里有塔曰榴花塔塔左爲花溪右爲銀塘飛起兵時與元兵大戰處每陰雨猶聞金鼓聲同時有許之鑑城西人集兵赴義榴花之戰之鑑功爲多飛死之鑑從文天祥於汀州力戰五嶺坡被執不屈死區適子字正叔南海人通經史能文辭里人慕之多造門求講所居地舊名鮑州而適子號登洲鄉間稱爲登洲先生家素饒於財抱道不仕嘗遇歲大饑出粟爲粥以餉貧民人感其德元末羣盜過其墓相戒曰勿犯此吾施粥主人也有詩文集若干卷故老相傳今訓蒙三字經適子所撰文殊馴雅童子咸習之

廖金鳳字叔祥增城功武人母何氏夢彩鳳入懷而生故名理
宗開慶中進士初授增城令有惠政時國事多艱召募忠義
以圖恢復金鳳首應詔著績遂有太尉之命後元兵入閩宰
臣張世傑挾衛王駐崖山時鳳守梅關卽率兵勤王崖山民
賴以安立祠祀之宋亡歸隱西林娛情山水蓋衣冠巢許者
也

梁百揆字宗盛番禺人嘉定中進士累官奉議大夫立朝侃侃
雖職非言路而屢疏條議國政竟以直諫忤時引疾乞休退
隱禺山闊異端彰聖學有功名教學者稱爲端懿先生
趙若舉香山人本宋宗室有拳勇端宗時王師航海若舉赴難
授武翼大夫召募潮居里民數百以勤王擢廣南東路兵馬
鈐轄宋亡元張宏範欲屠潮居里若舉力以一鄉民命爲請

於是潮居里民二百餘家賴以安堵

陳元輔陳英輔祖珠自汴梁謫宦南雄遷新會凌村祥興駐蹕
厓山兄弟獻粟數千石餉軍特旨建義士坊於其里輔等遺
戒子孫不得仕元明時其裔經綸輩始顯



